


Temp de Pèsca te l'auta Fascia

Ence i più joegn tol pèrt a la vita de la comunanza, percheche la tradizions e la devozion de nesc giaves no more

Te la Setemèna Sènta la tradizion ladina de l'auta Fascia vel che la jent, l vender, la sabeda e la domenia de Pèsca, la festejee con jeghes e usanzas la ressurezion de Gejù Crist. Nos joegn de la scola mesèna de Ciampedel aon dat nesc contribut per didèr te gejia e te paìsc te desvaliva ativitèdes che ve conton te chest picol articol.

Jebia Sènta: Te chesta dì, da sera, aon festejà l'ùltima cena e a Ciampedel 10 bec i à ence ciapà per la pruma outa la Sènta Comunion. Endèna messa à sonà per l'ùltima outa la ciampènes; dò aon bele cognù tachèr a jir co la batoles.

Vender Sènt: Jà da les 6 da doman i più gregn i é jic co la batoles: l'era na procescion de passa 50 persones che à descedà fora duta la jent del paìsc. Nos aon tacà a jir da les 8 da doman per envièr la jent a jir a dir su le lodi; dapò sion jic ence dal mesdì percheche la ciampènes sonassa da chest'ora. Da mesdì siane zirca 30 bec, da chi che va amò a la scolina enscin ai conscric, ogneun con sia batola enjignèda da vèlch parent o dai tislères. Sion partii da piaz veie de Ciampedel e dò esser jic en roda per dut l paìsc smacan la batoles, sion jic a marenèr da mègher a cèsa. Dant de la funzion de les 3 e de chela da les 8 sion endò jic co la batoles per avisèr la jent de



La batola.

jir te gejia. Valgugn te anter nesc amisc a smacà massa fort (o la batola era massa derenèda) e i l'à spachèda te doi pèrts.

Sabeda Sènta: ence chesta dì sion jic con la batoles da la valiva ores, fora che da les 3 percheche sion jic da sera dant da la Messa de les 9. Da mesdì se aon ence fermà al Tobia a se magnèr su zeche da bon. Chisc dis aon abù n muie da fèr a servir Messa: anter funzioms e proes siane béleche semper te gejia. Domenia de Pèsca: da doman duta la jent (o chi che à podù) é jita a Messa grana. Domesdì aon ence scomenzà a pechenèr: ta Ciampedel se se

comprèa i eves e dapò l'era na gran "verejèda". L'era ence de bie pesé e soraldut se aon godù n muie a bater de spiz e de cuf. Chi da Dèlba e Penia dò marena i é jic a rosèr e dò duc, gregn e picoi, te bar de Penia a pechenèr. Fosc te anter l'era ence valgugn con n ef de legn percheche no l volea perder.

L'é stat dis n muie piens de doeres ma se aon ence godù: bona Pèsca a duc (ence se sion tardives).

I scolees del laboratorie de giornalism de la mesènes de Ciampedel, col prof. Thomas Zulian